

AL TE'A LIJE'E SAN JUAN LINIĒ'EPOLA' LAPIMAYE

1 Lipangopa jahuay, iŕque tipa'a. Illanc' joupa aŕquimf'epá laŕpalaic'oponga', joupa aŕsingopá laŕ'u', lahuelojmpá, limetsaicopá naitsi iŕque. Laŕmane' joupa aŕ'noŕ'e'epá limane'. Illanc' maluya'ayi, aŕpalaicoyi iŕque ŕacui'impa: Lataiqui'. Iŕque Lataiqui' imaf'i'. Lipitine aimijouya. Maŕe litine tepi'iyale. ²Iŕque imujpoxi. Illanc' joupa aŕsimpá, luya'ayi, lu'ilhuo' imanc' te ts'i'ic' lipitine pe aimijouya. Iŕque petsi aimijouya lipitine tiŕmana' anuli qui'Ailli' ŁanDios, imujpoxi, aŕsimpá. ³Itsiya jouc'a lu'ilhuo' imanc' te ts'i'ic' laŕsimpa, laŕquimf'epa. Ja'ni tolapenuf'me iŕe laŕtaiqui' aŕinca aŕejmale'me. Illanc' aŕejmale ŁanDios caŕ'Ailli' y Jesucristo, iŕque hi'Hua ŁanDios. Imanc' jouc'a ti'i'ma tonŕejmale'me toŕta'a. ⁴Aŕcuayi: Tenanŕa' laixojcopa calata. Toŕiya aliniŕelhuo' iŕta'a coŕje'e. ⁵Jesucristo joupa lu'iponga' laluya'ayacu. Itsiya cu'ilhuo' imanc', ticua: "ŁanDios lipicuejma' pangay epalc'o', ailopa'a quixcay". ⁶Toŕiya, ma maŕnesyi: "Illanc' aŕejmale ŁanDios", ja'ni ti'hua aŕ'eyi quixcay aŕ'ij ŕinca iŕe laŕnespa. Aŕfelŕaiqueyi.

⁷Pe lopa'a ŁanDios jiŕpiya pangay epalc'o', ailopa'a quixcay. Ja'ni toŕta'a laŕpepajnya, aŕinca aŕejmale laŕpimaye. Tijouŕa', ja'ni aŕ'ijc'a laŕ'epa aimaŕmanecu nulemma. Lijuats' lixcuajaipa Jesucristo hi'Hua ŁanDios ti'hua alapac'enga'.

⁸Aimi'iya maŕnesyacú: "Iya' aicai'aic' quixcay. Ailopa'a caijunac'." Ja'ni toŕta'a aŕnesyi aŕfel'miyotŕsi. Al ŕinca Cataiqui' aiquitsufaic' laŕpicuejma'. ⁹Ja'ni aŕmiyi ŁanDios: "Łinca, tipa'a laijunac'", iŕque limenc'e'eco'monga' iŕna'a laŕ'epa. Lapac'e'monga' al xujc'a. Toŕta'a li'ejma' ŁanDios. Iŕque ti'e'ma ma to linespa. Ti'e'ma al ŕijca. ¹⁰ŁanDios joupa lu'iponga': "O'epa quixcay". Ja'ni aŕcuayi: "Aicai'aic' quixcay", litaiqui' aiquitsufaic' laŕpicuejma'. Tocomma to aŕcuayi: "ŁanDios infel'miyale".

2 Imanc' unc'ainaxque' iŕta'a caifniniŕecopolhuo' coŕje'e aimoŕ'econa'me lixcay. Ja'ni limenajponga', ja'ni joupa aŕ'epá lixcay, jiŕpe pe lopa'a caŕ'Ailli' ŁanDios tipa'a Jesucristo Naŕtalaiŕecoponga'. Iŕque ailopa'a quijunac', ma' aŕ'ijca li'epa. ²Iŕque i'najtŕepa laŕjunac'. Toŕta'a ipac'epa

lipoyac' ÆanDios. I'najtsepa laĵjunac', jouc'a i'najtsepa liĵjunac' jahuay lan xanuc' nomana' ni petsi li'a łamats'.

³Ja'ni a'eyi lałcuxe'eponga'

ÆanDios, ałsina' ałınca limetsaijma.

⁴Pe nocuapa: “Nimetsaijma

ÆanDios”, tijoula' aimi'ay locuxe'epa, iłque cal xans tifełaique. Al Linca Cataiqui' aiquitsufaic' lipicuejma'.

⁵Ja'ni a'efe lałcuxe'eponga' ÆanDios, ałınca a'eyi capic'a iłque. Tołta'a ałsina' ÆanDios lapenufponga'. ⁶Pe nocuapa: “Iya', ÆanDios lapenufpa”, ticuicomma ti'ila' li'ejma' to li'ejma' Cristo.

⁷Maicunc'aipimaye, iłta'a lainini'epolhuo', laifxc'ai'ipolhuo' a'ij ts'e cataiqui'. Imanc' joupá olapenufpa' jilpe litine lo'huaiyijmpa Jesucristo. Małe lataiqui' cu'ilhuo', caxc'ai'ilhuo' itsiya. ⁸Iłe lataiqui' laifxc'ai'ipolhuo' jouc'a canescojma to ats'e cataiqui'. Tołta'a imuj'ma Cristo. Uya'apa mipa'a fa'a li'a łamats'. Ma' anuli tołmujiyi imanc'. Li'ipa pangay muf lołpicuejma', itsiya a'i. Fa'a li'a łamats' ti'hua tuyaijma al muf, lepalc'o' joupá ipangopa tepalc'o'iyale. Iłe lataiqui' ałınca epalc'o'.

⁹Pe nonespa: “Iya', lepalc'o' alulif'e”, tijoula' ja'ni ti'ay quipilaic' ĵipima, a'ij ĵınca iłe linespa. Lipicuejma' tipanemma muf.

¹⁰Naitsi no'epa quipic'a ĵipima iłque ĵınca aimenajyoxi lepalc'o', ailopa'a cuc'uilitsufeya. ¹¹Pe no'epa quipilaic' ĵipima iłque lipicuejma' amuf. Tołta'a tuyaijma lapajnya. Aiquixina' te ts'ic' lipene lo'huapa. Aiquixina' pe cotseya. Al muf lopa'a lipicuejma' i'epa afo'.

¹²Imanc' unc'ainaxque', ÆanDios joupá imenc'e'ecopolhuo' lo'epa lixcay, imetsaicopolhuo' olihuequi iłque łecui'impa Jesucristo. Tołiya quini'elhuo' iłta'a cołje'e. ¹³Imanc' unc'a'aillí, olimetsaijma iłque Nopa'a lipangopa li'a łamats'. Tołiya quini'elhuo' iłta'a cołje'e. Imanc' unc'amijcanó, joupá olulijpa' ĵıxcay xans, iłque łonta'a. Tołiya quini'elhuo' iłta'a cołje'e.

Imanc' inaxque' ÆanDios, joupá olimetsaicopá co'ailli'. Tołiya quini'elhuo' iłta'a cołje'e. ¹⁴Imanc' unc'a'aillí, olimetsaijma iłque Nopa'a lipangopa li'a łamats'. Tołiya quini'elhuo' iłta'a cołje'e. Imanc' unc'amijcanó tipa'a lołpujfxi. Joupá olapenufpa' litaiqui' ÆanDios. Iłe lataiqui' copa'a lołpicuejma'. Joupá olulijpa' ĵıxcay xans, iłque łonta'a. Tołiya quini'elhuo' iłta'a cołje'e.

¹⁵Cunc'aipimaye, aimołjanaj'me moluyalaico'me to lan xanuc' nomana' fa'a li'a łamats', iłne naihuejpa' quıłtuca' liłpicuejma'. Aimołjanaj'me lopa'a fa'a. Naitsi ti'onhicoyoxi tołniya o tıjanaca tołna'a, iłque aimi'ay capic'a ÆanDios, xonca ti'ay capic'a lopa'a fa'a li'a łamats'. ¹⁶Lan xanuc' pe aimimetsaicoyi ÆanDios iłne ticuxeyołtsi quıłtuca'. A'ijc'a lojanajpa iłniya. Tehuelojnyi, tıjanajyi. Tinescoyołtsi xonca ac'a ĵi'hueca, xonca' ac'a lo'epa. Iłe li'ejma' aiqui'huayoya ÆanDios. Iłque aimimuc'iyale tołta'a. Iłe i'ejma' lił'as xanuc' nomana' li'a łamats'. ¹⁷Iłca'a łamats' aimicołya. Ti'hua tuyaijpa. Jouc'a tıjouna'ma jahuay lojanajpa iłniya pe aimimetsaicoyi ÆanDios. Petsi

no'epá lixpicejma' ÆanDios, iñniya aimijouya lihpitine.

¹⁸Cunc'ainaxque' camilhuo': Joupá icuai'me lijoucola' quitiné. Joupá oñcuejpá limimpolhuo': "Ticuaihuo cal Anticristo. Iñque naixtuc'opa cal Cristo." Itsiya timana' axpela' lan anticristo. Tohiya ałsina' joupá icuai'me hijoujma quitiné. ¹⁹Iñe lan anticristo enajpołtsi, ałpo'no ponga' całtuca'. Tama li'ipa ałejmalepá, iñe a'i capimaye. Ja'ni apimaye cola' ałmana' anuli itsiya. Joupá ałpo'no ponga' całtuca'. Tołta'a ałmuc'iponga' te ts'i'ic' lihpicejma' iñniya. Tama anuli lalafot'epołtsi timana' petsi ituca' lihpicejma', a'ij nuli illanc'.

²⁰Imanc' a'i to iñniya. Cal Paxi hi'Hua ÆanDios joupá ipaxnepolhuo'. Epi'ipolhuo' cal Espíritu Santo. Tołta'a ti'i'ma tołcuc'e'me jahuay litaiqui' ÆanDios, aimoñesyacu: "Aicaicueca". ²¹Itsiya ma quini'elhuo' col'je'e aicacua: "Iñe laipimaye aiquilimetsajma al Æinca Cataiqui'". A'i. Joupá ołsina' al Æinca Cataiqui' te ts'i'ic'. Ołsina' te ts'i'ic' loya'apa petsi naihuejpá al Æinca Cataiqui'. Iñniya aimuya'ayacu lafellaiqueya cataiqui'. Aimi'iyá.

²²¿Naitsi iñque noya'apa lafellaiqueya cataiqui'? Iñque noya'apa tołta'a ticua: "Jesús, iñque a'ij Cristo. A'i iñque munłueyale." Petsi nocuapa tołta'a copa'a cal Anticristo. Iñque tetets'i cał'Ailli' ÆanDios, jouc'a tetets'i hi'Hua ÆanDios. ²³Petsi natets'ipá hi'Hua cał'Ailli' ÆanDios, nocuapá: "Iñque a'ij Cristo", iñniya aikuilepenufi cał'Ailli' jouc'a. Petsi naimetsaicopá hi'Hua, nocuapá: "Iñque Æinca

aCristo", iñniya joupá epenufpá cał'Ailli' ÆanDios jouc'a.

²⁴Imanc' aimolihuej'me ocuena cataiqui'. Lipangopa lo'huaiyijmpa Jesucristo olapenufpá al Æinca Cataiqui', tipanenni iñe lataiqui' jilpe lołpicuejma'. Mipa'a iñe lataiqui' jilpe lołpicuejma' aimolanajyacołtsi hi'Hua cał'Ailli' ÆanDios, ni aimolanajyacołtsi cał'Ailli' ÆanDios. ²⁵Cristo joupá icupa cataiqui'. Icuapa: "Capi'i'mola' lihpitine aimijouya". Iñe lałpitine lapi'i'monga' ja'ni aimalanajyołtsi.

²⁶Tołta'a lainini'epolhuo'. Capalaicola' iñniya pe ts'i'pic'a tifel'miyalete. ²⁷Imanc' ituca' lołpicuejma'. Cristo joupá ipaxnepolhuo', olapenufpá cal Espíritu Santo. Tołta'a aimicuicomma comxi mimuc'iyacolhuo'. Iñque pe łepi'impolhuo', jahuay timuc'ilhuo'. Iñque timuc'iyale al Æinca. Aimifel'miyale. Cristo joupá imuc'ipolhuo'. Aimolanaj'mołtsi iñque.

²⁸Cunc'ainaxque', itsiya camilhuo': Aimolanaj'mołtsi Cristo. Tołta'a ticuaiconanni iñque aimalsinyacu calaic'ata. Tixoj'ma calata limetsaico'me.

²⁹Imanc' ołsina' te ts'i'ic' li'ejma' ÆanDios. Iñque ti'ay ma le'a al hijca. Ja'ni tołta'a ołsina', jouc'a ołsina' te ts'i'ic' li'ejma' petsi ałinca inaxque' ÆanDios. Iñe jouc'a ti'eyi al hijca.

3 Juaiconapa acueca' a'leponga' capic'a cał'Ailli' ÆanDios. Alacui'iponga': "Inaxque' ÆanDios". Ma' ałinca illanc' inaxque' ÆanDios. Locuenaye lan xanuc' nomana' fa'a li'a łamats'

aicalimetsaiconinga' tołta'a. Aimí'íya. Hne aimimetsaicoyi ŁanDios. ²Maicunc'aipimaye, itsiya ałsina' illanc' inaxque' ŁanDios. Tama tołta'a ałsina', aicalsina' te ts'i'ic' mi'íya laksans, lałpicuejma' tipaicotsi pu'hua. Aicalmuc'inninga'. Linca litine timujxoxi ŁanDios ałsim'me itque ma to qui'ic'. He lałsina' ałmuc'inga' ałsim'mołtsi pangay c'a lałpicuejma' ma to lipicuejma' itque. Ja'ni a'i cola' aimalsinyacu to qui'ic'. ³Hne petsi jouc'a no'huaiyijmpá tołta'a, jahuary ihniya, tenaj'mołtsi lixcay, ti'imołtsi limpio, to ŁanDios pangay limpio lipicuejma'.

⁴Ja'ni aimalihuejcoyi ŁanDios locuxepa, ite lałepa ma' ixcay. Jahuary lo'epa ja'ni a'i to micuxe ŁanDios, ite ma le'a ixcay. ⁵Imanc' joupa ołsina' te quicuaicoco'ma Jesucristo fa'a li'a łamats'. Icuaiacoco'ma liłonc'e'etsonga' lałepa lixcay. Jouc'a ołsina' itque linca aiqui'aic' quixcay. ⁶Tołiya petsi aimenajyołtsi Cristo, pe joupa lepenufpola', ihniya aimi'eyi lixcay. Petsi no'epá lixcay ite aimimetsaicoyi Cristo. Aiquiłsina' te ts'i'ic' lipicuejma'.

⁷Imanc' unc'ainaxque', tołpo'nołe cuenna. Tołta'a aimifel'miyacolhuo'. Hne petsi no'epá al hijca ma le'a ihniya lan hijca xanuc'. Hne liłpicuejma' alijca to al hijca lipicuejma' ŁanDios. ⁸Petsi no'epá lixcay ihniya ixanuc' łonta'a Satanás. Lipangopa li'a łamats' itque Satanás joupa ixcay lo'epa. Li'Hua ŁanDios icuacoco'ma fa'a li'a łamats' tejac'eła' ite lo'epa Satanás, aimale'cona'me tołta'a.

⁹Petsi ałinca inaxque' ŁanDios ite aimi'eyi lixcay. Jiłpe liłpicuejma' ŁanDios joupa ifapa Litaquí'. Joupa epi'ipola' al ts'e liłpitine. Tołta'a aimi'íya mi'econayacu lixcay.

¹⁰Tołta'a ti'ima tolimetsaico'mola' lan xanuc' te ts'i'ic' liłpicuejma'. Ihniya quiłtuca' timuj'mołtsi ja'ni inaxque' ŁanDios, ja'ni inaxque' łonta'a. Petsi aimi'eyi al hijca ite a'i quinaxque' ŁanDios. Jouc'a petsi aimi'eyi capic'a liłpimaye a'i quinaxque' ŁanDios.

¹¹Lipangopa lo'huaiyijmpa Jesucristo u'impolhuo' tołta'a. Ixc'ai'impolhuo': "Ałetsołtsi capic'a". ¹²A'i tołta'a li'ejma' Caín. Itque i'hua łonta'a. Łonta'a lo'epa ma le'a al xujca. Caín ima'apa hipima. ¿Te quima'acopa? Lipima ac'a li'ejma', Caín li'ejma' ixcay. Tołta'a ima'apa hipima.

¹³Cunc'aipimaye, lan xanuc' petsi aimimetsaicoyi ŁanDios tama ti'ennilhuo' capilaic', aimołsuełmot'lecona'me. ¹⁴Illanc' ałeyi capic'a lałpimaye, tołta'a ałsinyi lapi'iponga' al ts'e lałpitine ŁanDios. Li'ipa, anuli locuenaye lan xanuc' lajac'ponga'. Itsiya a'i. I'ipa ituca' lałpepajnya. Petsi aimi'eyi capic'a liłpimaye, ite linca ailopa'a al ts'e liłpitine, ejac'pola'. ¹⁵Naitsi no'epa laic' hipima, itque inma'ahuale. Linma'ahuale ailopa'a al ts'e quiłpitine.

¹⁶Illanc' joupa ałsina' te ts'i'ic' lałeyacu ja'ni ałinca' a'ela' capic'a lałpimaye. Cristo ma'enga' capic'a icupoxi tima'anle. Tołta'a lunłu'eponga'. Illanc' jouc'a ałcutsoltsi, ałcuanałcotsola'

lałpimaye. ¹⁷ Cal xans ts'i'hueca, loyaicopa lapajnya ja'ni tixinla' hipima tehue'e', ¿te co'eya? Ja'ni aimixina acuanuc', aimitoc'i, iłque cal xans ¿ja'ni tołta'a ti'ay capic'a ŁanDios? A'i. Aimi'ay capic'a.

¹⁸ Imanc' unc'ainaxque', camilhuo': He małehualeyi capic'a aimi'i'ma le'a ataiqui'. A'i ma le'a ałnes'me: "Ca'ela' capic'a". Ałınca ał'etsola' capic'a. Ałtoc'itsola' lałpimaye.

¹⁹ Tołta'a ałpac'e'e'mołtsi lałpicuejma'.

Aimałsuełmot'leconayacu, aimałmiconayacołtsi: "¿Te iya' i'hua ŁanDios o a'i?" Ti'i'ma całsina' joupa ifapa al Linca Cataiqui' jilpe lałpicuejma'. ²⁰ Tijoula' ja'ni ałsuełmot'lecona'me, ja'ni ałmiconamołtsi: "¿Te iya' i'hua ŁanDios o a'i?", jouc'a ałnujuaitsa xonca ixina' cal Cueca' CanDios. Iłque ixina' jahuay lał'epa. Ixina' jahuay lopa'a jilpe lałpicuejma', łalunxajma'. ²¹ Maicunc'aipimaye, ja'ni aimաsuełmot'leyi tołta'a, ja'ni ałsinyołtsi ałınca illanc' inaxque' ŁanDios, tixoj'ma calata ałpalaic'o'me ŁanDios. ²² Tijoula' pe lałsahue'epa iłque lapi'i'monga'. Ałsim'monga' lihuejcoyi lałcuxe'eponga'. Tetenłcocojma lał'epa. ²³ Ałcuxe'eponga' ał'huaiyijnle hi'Hua, iłque Jesucristo. Jouc'a ałcuxe'eponga' ał'etsołtsi capic'a. Ma' anuli toliya lałcuxe'eponga' Jesucristo. ²⁴ Ja'ni alihuejcoyi ŁanDios locuxepa, aimalanajyacolołtsi ŁanDios. Jouc'a ŁanDios aimenajyacoxi, luyalaico'me anuli. Ałsinguf'mołtsi tipa'a cal Espíritu Santo, iłque Łalapi'iponga' ŁanDios. Tołta'a

ałsim'me aiquenajyoxi ŁanDios. Ałsim'me luyalaicoyi anuli.

4 Maicunc'aipimaye, aimon'e'mola' linca jahuay lam profeta nocuapá: "Iya' cuya'e' lalul'ipa cal Espíritu Santo". Tołpo'note cuenna. Ti'ila' cołsina' ja'ni umme'epola' ŁanDios o a'i. Itsiya fa'a li'a łamats' timana' axpela' linfel'miyale. Joupa ummempola' ti'ete tołta'a. ² Imanc' joupa ołsina' te ts'i'ic' lonespa pe noya'apá lomipola' hi'Espíritu ŁanDios. Iłne ticuayi: "Jesús aCristo. I'epoxi xans. Icuai'ma fa'a li'a łamats'." ³ Petsi aimimetsaicoyi tołta'a Jesús, iłne aimuya'ayi lonespa hi'Espíritu ŁanDios. Iłne tu'iyaleyi loya'apa hi'espíritu cal Anticristo. Imanc' joupa ołcuejpá ticuaihuo iłque cal espíritu. Camilhuo': "Joupa icuai'ma. Tipa'a fa'a li'a łamats'."

⁴ Imanc' unc'ainaxque', joupa olulijpola' iłniya lam profeta. Iłne aimi'iya mifel'miyacolhuo'. Imanc' joupa olapenufpá hi'Espíritu ŁanDios. Iłque xonca acueca'. Łonta'a nopa'a li'a łamats' aimi'onłcospa. ⁵ Iłne linfel'miyale profeta ti'onłcospá to liłf'as xanuc' nomana' li'a łamats'. Ma' anuli liłpicuejma', lolalaipa. Toliya liłf'as xanuc' tiquimf'eyi, tihuejcoyi. ⁶ Illanc' inaxque' ŁanDios ituca' lałpicuejma'. Petsi ilimetsaijma ŁanDios, iłne ałquimf'enga'. Petsi a'i quinaxque' ŁanDios, iłne aimałquimf'enga'. Tołta'a ałsina' naitsi iłne noya'apá al Linca Cataiqui'. Ałsina' naitsi noya'apa a'ij linca.

⁷ Maicunc'aipimaye, ał'etsołtsi capic'a. Ma ŁanDios alapi'icoponga'

lałpicuejma' ał'etsoltsi capic'a.
Naitsi no'epa capic'a, iłque ĩnca
i'hua ŁanDios, imetsaijma ŁanDios.

⁸ŁanDios ti'nujuaitsila' jahuay
lan xanuc', aimi'elaj laic'. Tołiya
ja'ni cal xans aimi'nujuaitsila'
lif'as xanuc', ja'ni ti'ela' laic',
iłque aiquimetsaijma ŁanDios.

⁹ŁanDios ałmuc'iponga' ma'
ałĩnca ał'nujuaitsinga'. Ummepa
hi'Hua, iłque cal Nuli. Ummepa
quicuaicoco'ma fa'a li'a łamats',
lapi'itsonga' al ts'e lałpitine. ¹⁰Ja'ni
ałĩnca ał'e'mola' capic'a lałpimaye,
ticuicomma ał'nujuaitsola' iłniya,
ma to ŁanDios ał'nujuaitsinga'
illanc'. Li'ipa aimał'nujuaisyi
ŁanDios. Małniya ĩtiné iłque
ał'nujuaisponga', ummepa hi'Hua.
Iłque hi'Hua i'najtsepa lałjunac',
ipac'epa lipoyac' ŁanDios.

¹¹Maicunc'aipimaye, ja'ni tołta'a
ał'nujuaisponga' ŁanDios, illanc'
jouc'a ał'etsola' capic'a lałpimaye.
Ticuicomma ał'etsola' capic'a.

¹²ŁanDios ni naitsi niximpa. Ja'ni
ał'eyołtsi capic'a jouc'a ał'eyi capic'a
ŁanDios. Tołta'a iłque tipa'a pe
lałmana', aicalanajyołtsi. ¹³ŁanDios
joupa lapi'iponga' hi'Espĩritu. Tołiya
ałsina' alapenufponga', ałsina'
lapenufpá iłque.

¹⁴Illanc' joupa ałsimpá li'epa
całAilli' ŁanDios. Iłque ummecopa
hi'Hua tunł'etsola' lan xanuc'
nomana' ni petsi fa'a li'a łamats'.
Tołta'a luya'ayi. ¹⁵Petsi nonespá:
“Jesús ma' i'Hua ŁanDios”, iłniya
joupa epenufpá ŁanDios. ŁanDios
epenufpola'.

¹⁶Joupa i'ipa całsina' ŁanDios
ał'enga' capic'a. Ałsina'
ał'nujuaitsinga'. ŁanDios pangay

c'a lipicuejma', ti'nujuaitsila' jahuay
lan xanuc', aimi'elaj laic'. Petsi
no'epá capic'a iłne aimi'eyi laic'.
Iłne ĩnca ŁanDios epenufpola',
aiquenajyołxi. Pe lomana' ĩłpe tipa'a
ŁanDios, tuyalaicoyi anuli. ¹⁷Ja'ni
ał'eyi capic'a aimałspaic'eyacu
locuaicoya al Cueca' Quitine. Ma
małmana' fa'a li'a łamats' ałsinyołtsi
ninc'iłijca, ał'onłcosponga' to
Cristo, iłque copa'a cal Łijca.

¹⁸Ja'ni ał'eyi capic'a ailopa'a
całspaic'eyaconga'. Ma mał'eyi
capic'a łaxpaiqui' aimi'iya mipa'neya
lałpicuejma'. Ja'ni ałnesyi: “Aga
latełmi'ma ŁanDios”, tocomma
to ŁanDios ałtełminga'. Małnesyi
tołta'a ałmujyołtsi aiquixhueya
lałpicuejma', lahue'enga'. Ałi tołta'a
mał'eyi capic'a.

¹⁹ŁanDios ał'nujuaisponga',
ał'eponga' capic'a, tołiya illanc'
jouc'a ał'eyi capic'a.

²⁰Petsi nocuapa: “Iya' ca'ay capic'a
ŁanDios”, ja'ni ti'ay quipilaic' ĩpima,
iłque no'epa iłta'a infelłaiquepa.
Ja'ni aimi'ay capic'a ĩpima petsi
łahuelojmpa, iłque jouc'a i'hua
ŁanDios, ĩte ti'i'ma ti'e'ma capic'a
ŁanDios, iłque petsi aimehuelonge?
Ałi. Aimi'iya. ²¹Małque ŁanDios
joupa ałcuxe'eponga' lał'eyacu,
ałminga': “Naitsi no'epa capic'a
ŁanDios jouc'a ti'ela' capic'a ĩpima”.

5 Petsi no'huaiyijmpá Jesús,
nonespá: “Iłque cal Cristo”,
iłne ĩnca inaxque' ŁanDios. Iłque
epi'ipola' al ts'e liłpitine. Petsi
lepi'impola' al ts'e liłpitine ti'eyi
capic'a ŁanDios quiłAilli'. Ma' anuli
ti'eyi capic'a liłpimaye, iłne jouc'a
inaxque' ŁanDios. ²Ja'ni ał'eyi
capic'a ŁanDios, ja'ni ał'eyi ma

to laɬcuxe'eponga', toɬta'a aɬsina' aɬ'nujuaitsila' laɬpimaye, aɬ'eyi capic'a. ³¿Te ts'i'ic' maɬ'eyacu capic'a ÆanDios? Aɬ'ete ma to laɬcuxe'eponga', toɬta'a aɬ'e'me capic'a ÆanDios. A'i quipime iɬe laɬcuxe'eponga' ÆanDios. ⁴Illanc' hınca inaxque' ÆanDios ja'ni iɬque lapi'iponga' al ts'e laɬpitine. Alulijyi lixcay lopa'a fa'a li'a ɬamats'. Tohiya aɬsinyi a'i quipime laɬcuxe'eponga'. Illanc' inaxque' ÆanDios, ¿te ts'i'ic' malulijyacu lixcay lopa'a fa'a li'a ɬamats'? Ma maɬ'huaiyijnyi ÆanDios toɬta'a alulij'me. ⁵¿Naitsi iɬque nolijpa lixcay lopa'a fa'a li'a ɬamats'? Petsi no'huaiyijmpa Jesús, nocuapa: “Jesús ma i'Hua ÆanDios”, iɬque tuliqui.

⁶Jesús mipa'a fa'a li'a ɬamats' epo'icom'me aja', ixcuajaipa lijuats'. A'i ma le'a epo'icom'me aja', epo'icom'me aja' jouc'a ixcuajaipa lijuats'. Toɬta'a aɬsina' maɬque Jesús aCristo, hi'Hua ÆanDios. Ma' anuli loya'apa cal Espíritu Santo. Iɬque tuya'e' ma le'a al hınca. ⁷Jiɬpe lema'a timana' afantsi tuya'ayi: “Jesús i'Hua ÆanDios, aCristo”. Iɬniya comana' caɬ'Ailli' ÆanDios, jouc'a Jesús, iɬque tecui'impá “Litaiqui' ÆanDios”, jouc'a cal Espíritu Santo. Iɬne lam fantsi ma' anuli ÆanDios.

⁸Fa'a li'a ɬamats' timana' afantsi nonescopá Jesús, tuya'ayi naitsi iɬque, ma' anuli loya'apa. Cal Espíritu Santo, iɬque anuli, laja' lepo'icompa Jesús, iɬe i'ipa oque', lijuats' lixcuajaipa, iɬe i'ipa afane'.

⁹Ja'ni aɬ'huaiyijm'me loya'apa lan xanuc', ¿te aimá'huaiyijnyacu loya'apa ÆanDios? Eınca iɬque loya'apa xonca acueca'. ÆanDios

joupa inescopa al c'a iɬque hi'Hua. Toɬta'a luya'apa ÆanDios, aɬ'huaiyijmpá. ¹⁰Petsi no'huaiyijmpá Jesús joupa epenufpá iɬe luya'apa ÆanDios. Petsi aimi'eyi hınca ÆanDios iɬe linescopa hi'Hua, iɬniya joupa etets'ipá licuapa ÆanDios, iximpá to infel'miyale, aimi'eyi hınca ÆanDios linescopa hi'Hua.

¹¹Pe naɬ'huaiyijmpá aɬsina' al hınca luya'apa ÆanDios. Aɬsina' lapi'iponga' al ts'e laɬpitine aimijouya, maɬe lipitine Jesús hi'Hua ÆanDios. ¹²Petsi joupa nepenufpá hi'Hua ÆanDios, iɬniya tipa'a al ts'e liɬpitine. Ja'ni aiquirepenufi hi'Hua jouc'a ailopa'a al ts'e liɬpitine.

¹³Toɬta'a laininiɬ'epolhuo' imanc' noɬ'huaiyijmpá Jesús, iɬque hi'Hua ÆanDios. Cacula: Ti'ila' coɬsina' joupa olapenufpá loɬpitine aimijouya.

¹⁴Maɬ'huaiyijnyi ÆanDios aɬsina' ti'i'ma aɬsahue'e'me aɬtoc'itsonga' o aɬsahue'e'me lapi'itsonga' lalahue'eponga'. Aɬsa'hue'me aimá'sinyacu calaic'ata. Ja'ni iɬe laɬsahue'epa tetenɬcocojma aɬsina' aɬquimf'enga'. ¹⁵Ma maɬsa'hueyi, ja'ni aɬsina' aɬquimf'enga' jouc'a aɬsina' joupa aɬtalai'eponga', joupa lapi'iponga' laɬsahue'epa.

¹⁶Anuli imanc' ja'ni toxim'ma ɬopima lo'epa aimetenɬma ÆanDios, ja'ni iɬe lo'epa ti'i'ma timenc'e'ecom'me, toxa'hueɬa' ÆanDios, toɬta'a tepi'i'ma lipitine. Eınca tipa'a lixcay lacani'eyacola' lan xanuc'. Aimi'iya mimenc'e'ecoyacola' no'epá toɬta'a. Iɬne ti'hua titai'me liɬjunac', tejac'em'mola'. Aicamilhuo': Toɬsa'hueɬe timenc'e'ecotsola'.

A'i. Aimi'iya. ¹⁷Lan xanuc' ja'ni aimihuejcoyi ŁanDios iłque ixim'mola' ixçay lo'epa. Ixim'mola' titaiyi cajunac'. Tipa'a iłe lixçay lo'epa ti'i'ma timenc'e'ecom'mola'. Tipa'a petsi aimi'iya, tejac'em'mola' nulemma.

¹⁸Ałsina' petsi ŁanDios lepi'ipola' al ts'e liłpitine iłne aimi'hua mi'econayi lixçay. Iłne tipa'a al ts'e liłpitine lepi'ipola' ŁanDios. Iłe al ts'e liłpitine ti'ela' cuenna. Tołiya ailopa'a co'e'eyacola' łonta'a. Iłque ma' ixçay lipicuejma'. ¹⁹Ałsinyołtsi illanc' inaxque' ŁanDios. Iłque lapi'iponga' lałpitine. Petsi aimimetsaicoyi ŁanDios, iłque

liççay conta'a ti'hua ticuxela'.

²⁰Jouc'a ałsina' te ts'i'ic' li'epa hi'Hua ŁanDios. Iłque icuai'ma fa'a li'a łamats'. Lapi'iponga' lałpicuejma'. Tołiya limetsaicoyi ŁanDios, iłque ma' anDios. Ja'ni lapenufponga' hi'Hua ŁanDios, iłque Jesucristo, ma' anuli lapenufponga' ŁanDios. Iłque ma' anDios, aimijouya lipitine. Ja'ni limetsaicoyi tołta'a jouc'a lapi'inga' al ts'e lałpitine aimijouya. ²¹Imanc' caxinnilhuo' to cainaxque', tołta'a camilhuo': Toł'etsołtsi cuenna. Ti'hua tolihuejco'me iłque petsi ałinca anDios. Tołta'a aimonlihuejyacu landiosla'.